

唐
月
令
注

唐書藝文志載唐月令一卷唐明皇御刊定自禮記中第五易爲第一厥後屢請更正直至宋景祐初始復舊文則是書亦一代流傳舊籍也雖改亂篇次增損經文沿及宋元諸儒移易尙書離析大學筆削孝經變置周官出入風雅誠不免後人作俑之譏至首爲注解者如李哥奴弄麀杖杜尤卑鄙不足道然朱子作儀禮經傳通解載禮記月令鄭注併附注唐本於呂覽淮南之後且其中經文有依唐月令刪定者似亦僅有足取者焉況定立春爲正月之節至今時憲相承不改茲故錄其文而併考之 博雅君子或

者其不余責也夫時道光丁亥二月既望高郵郝泮
林自識

唐月令羣臣進注表

臣聞昔在唐堯則歷象日月敬授人時降及虞舜則
璿樞玉衡以齊七政夏后則更置小正周公則別爲
時訓斯皆月令之宗旨也逮夫呂氏纂習舊儀定以
孟春日在營室有拘恆檢無適變通不知氣逐閏移
節隨斗建泊乎月朔差異日星見殊乃合雩祀愆期
百工作沴事資革弊允屬宜更昭代敬天勤人順時
設教是以有皇極之敷言親降聖謨重有刪定乃依
於夏爰準攝提舉正於中匪乖期於積閏履端於始
不爽候於上元節氣由是合宜刑政以之咸序遂使

金木各得其性水火無相奪倫蓋所謂順乎天而應乎人者也乃命集賢院學士尙書左僕射兼右相吏部尙書李林甫門下侍郎陳希烈中書侍郎徐安貞直學士起居舍人劉光謙宣城大司馬齊光又河南府倉曹參軍陸善經修撰官家合寺丞兼知太史監事史元晏待制官安定郡別駕梁合瓚等爲之注解臣等虔奉綸音極思何有愧無演暢之能謬承載筆之寄義深罕測學淺無能莫副天心空塵聖意謹上

書唐月令

羅泌

敬授人時此帝堯之急政聖人以此首書民事之爲重可知矣禮有月令世皆以爲出於管子不韋之書故傅子云月令取呂氏春秋至杜君卿乃以爲出於管子不韋編之以爲十二紀之首漢世戴聖始取以入禮記蓋以管子有幼官四時之篇然亦不知周公已有時訓而時令解見之周書此蔡氏所以謂爲周公之作孟冬祈來年則建用子矣是周正也正歲合諸侯若諸侯之所稅非秦事也而或者猶謂周以六冕郊天以大裘玉輅大常迎氣而月令車服並依時

色況乃太尉秦有則非出於周代是亦不知劉安時則之訓本之月令而亦時有增損顧得謂漢時平常切攷之特亦本之夏小正耳小正之書顧亦本之前代炎黃顛譽一代之治斯有一代之時惟其來者甚遠是故歷代傳寶以爲大訓故雖有變易而其大者猶不得而易也頃見郭京易舉正序言我唐御注孝經刪定月令以知唐室嘗改古之月令矣中見斗南於世家獲唐板五經首帙爲覘其本既禮記以爲先而以月令冠篇曲禮次之月令之篇則於每月分節與中氣而異言之謂呂氏定以孟春日在管室無適

變通不知氣逐閏移節隨斗建泊乎月朔差異中星
見殊乃令雩祀愆期水旱作沴事資革弊於是定以
构建準攝提而刪之命集賢殿學士尙書左僕射兼
右相吏部尙書李林甫門下侍郎陳希烈等爲之注
此卽唐志御定禮記月令一卷者爰表出之以見唐
世猶以民事爲重云淳熙新元四之日墨莊藏書

唐月令考

新唐書集賢院學士李林甫陳希烈徐安貞直學士
劉光謙齊光又陸善經修撰官史元晏待制官梁令
瓚等注解自第五易爲第一

册府元龜包佶爲祕書監貞元七年上言開元中册
定禮記月令改爲時令其音及疏并開元有相涉者
未刊正請選通儒詳定從之會佶卒其事不行

長編大中祥符八年七月己未龍圖閣待制孫奭上
言伏以禮記舊月令一篇後漢司農鄭康成盧馬之
徒本而爲注又作周官及儀禮注並列學宮故三禮

俱以鄭爲主而月令一篇卷第五篇第六漢魏而下
傳授不絕唐陸德明撰釋文孔穎達撰正義篇卷第
次皆仍舊貫洎唐林甫作相乃扶摘微瑕棄先典
明皇因附益時事改易舊文謂之御刪定月令林甫
等爲之注解仍升其篇卷冠於禮記誠非古也當今
大興儒業博考前經宜復舊規式昭先訓臣謹繕寫
鄭注月令一本伏望付國子監雕印頒行詔禮儀院
與兩制詳定以聞旣而翰林學士晁迥等言若廢林
甫之新文用康成之舊注則國家四時之祭祀並須
更改詳究事理故難輕議伏請依舊用李林甫所注

月令從之景祐二年春正月乙巳直集賢院賈昌朝請以鄭司農所注月令復入禮記第五其李林甫所注自爲唐月令別行從之仍詔唐月令以備四孟月宣讀

案臧玉林經義雜記二十七引唐月令據鄭漁仲六經奧論知宋時國子監禮記尙用唐改本惟私家用鄭注本未審何時改復今以長編及晁公武陳振孫語証之然則改復者景祐初年也

宋三朝國史藝文志初禮記月令篇篇五卽鄭注唐明皇改黜舊文附益時事號御刪月令升爲首篇集賢院別爲之注厥後學者傳之而釋文義疏皆本鄭注遂有別注小疏者詞頗卑鄙淳化初判國子監李

至請復行鄭注詔兩制三館秘閣集議史館修撰韓丕張泌胡旦條陳唐本之失請如至奏餘皆請且如舊以便宣讀時令大中祥符中龍圖閣待制孫奭又言其事群論復以改作爲難遂罷

晁公武曰唐明皇刪定李林甫等注序謂呂氏定以孟春日在營室不知氣遂閏移節隨斗建於是重有刪定俾李林甫同陳希烈等八人爲之解景祐初改從舊文由是別行

葉夢得曰監本禮記月令唐明皇刪定李林甫所注也端拱中李至判國子監嘗請復古文本下兩制館

職議胡且等皆以爲然獨王元之不同遂廢後復數
有言者終以朝廷祭祀儀制等多本唐注故至今不
能改而私本則用鄭注也

羅泌曰唐刻五經禮記以月令冠篇曲禮次之月令
之篇則於每月分節與中氣而異言之謂呂氏定以
孟春日在營室無適變通不知氣逐閏移節隨斗建
泊乎月朔差異中星見殊乃令雩祀愆期水星作診
事資革弊於是定以构建準攝提而刪之命集賢殿
學士尙書左僕射兼右相吏部尙書李林甫門下侍

郎陳希烈爲之注

以上所引俱見
朱竹垞經義考

開成石經移置卷首冠於曲禮之上

張參五經文字序云唯禮記月令改從明皇定本音訓頗有不同

鄭樵六經輿論云今禮記之月令私本皆用鄭注監本月令乃唐明皇刪定李林甫所注端拱中李至判國子監嘗請復古文本以朝廷祭祀儀制等多本唐注故至今不能改

晁公武曰僞蜀張紹文所書石經禮記首之以月令題云御刪定蓋明皇也林甫等注蓋李林甫也其餘篇第如舊

又曰皇朝賈昌朝撰國朝時令十二卷景祐初復禮
記舊文其唐月令別行三年詔昌朝與丁度李淑集
國朝律歷典禮百度昏曉中星祠祀配侑歲時施行
約唐月令定爲時令一卷以備宣讀後昌朝注爲十
二卷奏上頒行

陳振孫曰唐因禮記舊文增損爲禮記首篇天寶中
改名時令景祐初始命復禮記舊文其唐之時令別
爲一篇遂命禮院修書官丁度等約唐時令撰定爲
國朝時令以便宣讀蓋自唐以來有明堂讀時令之
禮也

泮林

檢唐書藝文志載御刊定月令一卷自禮記第

五易爲第一又讀鄭樵六經輿論知宋時監本仍用

唐注朱竹垞經義考載唐月令云林甫等注未見

泮

林素好事因留意於唐人類書宋人類書中求之果

所在多有而太平御覽一書引涉唐月令之迹尤顯

蓋引禮記多先月令而後曲禮王制也惜其中兩引

祀行不作祀井注亦俱仍鄭注作行此種處多爲後

人妄改所失茲特細加別白抉出注文更採白帖歲

華紀麗及事類賦諸書注中引涉唐月令與鄭注不

同者亦間有依鄭注竄改者併唐月令經文一併錄

之課讀之暇謬謂鈔胥而卑鄙不識字之譏余固不能無滋愧云泮林再識

予兄輯唐月令注成授弱弟

上林

讀之並示以注中

所採者多古義焉其中如乃擇元辰注辰亥也說本
盧植見禮記正義齊書禮志引盧注吉亥之說尤詳
又如其性義其事言注引洪範五行傳說與事類賦
所引蔡邕月令章句視明禮修則麟臻互相証合是
其說亦自原本漢人朱竹垞經義考未見唐注極詆
分辨節氣七十二候之謬然唐注實本周公時訓不
得以一人無學槩議陸善經等爲不經之甚者也

上林

因書其語識之卷末謹跋

唐明皇御刊定禮記月令一卷

集賢院學士尚書左僕射兼右相吏部尚書李林甫
門下侍郎陳希烈中書侍郎徐安貞直學士起居舍
人劉光謙宣城大司馬齊光又河南府倉曹參軍陸
善經修撰官家令寺丞兼知太史監事史元晏待制
官安定郡別駕梁令瓚等注解

正月之節日在虛

立春爲正月之節謹案春秋傳曰履端於始謂節也
舉正於中謂氣也歸餘於終謂閏也既有閏則立春
進退不恒在正月朔日故不定爲孟春之月但得立

春則是正月之節可以行春令矣

御覽十八

昏昴中曉心中

案張參五經文字昏避廟諱改从氏今據改又案旦改作曉者避睿宗諱也

黃昏時昴星正當午位曉時心星正當午位凡記昏昴曉心中爲人君南面而聽天下觀時候以授人事也日入後二刻半爲昏日未出二刻半爲曉也

全上

汲古閣校本歲華紀麗一引經正月之節缺之節二字引注脫爲人君以下二語

斗建寅位之初

地十有二辰斗柄杓常左旋指地位故立春正月之節則斗建寅位之初書云璿璣玉衡以齊七政此之謂矣

御覽全上案璿璣之璣依表文當改作樞蓋群臣作表因明皇諱隆基故諱璣名也今从御

注覽

其日甲乙

春秋傳曰天有十日謂甲乙丙丁戊己庚辛壬癸甲

乙屬木主春故云其日甲乙

全上 案唐諱丙注丙當依下經文作景丁

其帝太皞其神句芒

昔太皞氏以木德繼天而王故爲春帝高辛氏有天

下置五行之官木正曰句芒故句芒爲木神佐太皞

於春

全上 事類賦注引全

其蟲鱗其音角

律中大蔟

律者候氣之管以竹爲之中猶應也正月氣至則大
蕪之律應應謂吹灰也大蕪者林鍾所生三分益一
管長八寸空徑三分圍九分

全上

其數八其性仁其事貌其味酸其臭羶
其祀戶祭先脾

春陽氣祀戶順陽氣也

事類賦注

立春之日東風解凍後五日蟄蟲始振後五日魚上冰
昔在周公作時訓定二十四氣辨七十二候每候相
去各五日以明天時將驗人事言聖人奉順天時則
萬物及節候也

御覽全上

玉海十二引唐注周公
作時訓定二十四氣辨七十二候

天子居青陽左个乘青輅駕蒼龍載青旂衣青衣服蒼
玉食麥與羊其器疏以達

案玉海九十六言唐注月
令十三室各在其辰之上

太史以先立春三日謁於天子曰某日立春盛德在木
天子乃齊

立春之日天子親率公卿諸侯大夫以迎春於東郊還
乃賞公卿諸侯大夫於朝

迎春爲祀青帝靈威仰於東郊以太皞配以句芒歲

星三辰七宿從祀

白帖

命相布德和令行慶施惠下及兆人慶賜遂行無有不
當

命太史司天歷候日月星辰宿離不貸無失經紀以初
爲常

歷推策也候占候也宿二十八宿也離猶歷也七曜
爲經二十八宿爲紀初謂孟春歲首也

白帖

是月也命有司祭風師

立春之後丑日祭風師於國城東北

御覽全上
通典禮四

是月也命有司覺龜筮占兆審卦吉凶

周禮龜人上春覺龜謂建寅之月

御覽七百
二十五

正月中氣日在危

雨水爲正月中氣凡中氣前後去節十五日春秋傳

日舉正於中此之謂也

御覽十八

昏畢中曉尾中斗建寅位之中

雨水之日獺祭魚後五日鴻雁來後五日草木萌動

天子乃命有司布農事舍東郊修封疆端徑術善相耶
陵阪險原隰土地所宜五穀所殖以教導人必躬親之
田事既飭先定準直農乃不惑

端正也徑步道也術車道也

白帖

天子乃以元日祈穀於上帝

元吉也謂上辛祈穀郊祀昊天上帝於圓丘以高祖
神堯皇帝配坐以五方帝從祀於壇春秋傳曰啟蟄

而郊祈而後耕此之謂矣

御覽全上

乃擇元辰天子親載耒耜置之車右率公卿諸侯大夫躬耕藉田天子三推三公五推卿諸侯九推還讌飲於大寢公卿諸侯大夫皆御命曰勞酒

辰亥也謂郊後吉亥享先農於東郊先農神農也

御覽

五百三十二

是月也命樂正習舞

春夏尙舞故命習之

御覽十八
事類賦注

乃修祭典命祀岳鎮海瀆犧牲無用牝

正月修祭典國重祭故歲首修之無用牝爲傷生生

之類也

白帖

禁止伐木

爲盛德所在

御覽全上

無麋無耶

無傷萌句之類

全上

無聚大衆無置城郭

妨農也

御覽一百九十三

掩骼埋胔

爲死氣逆生氣枯骨曰骼肉腐曰胔

御覽十八

是月也不可以稱兵稱兵必有天殃兵戎不起不可從

我始無變天之道無絕地之理無亂人之紀

孟春行夏令則雨水不時草木早落國時有恐行秋令則其人大疫飄風暴雨摠至藜莠蓬蒿並興行冬令則水潦爲敗雪霜大擊首種不入

擊傷也

事類賦注

二月之節日在營室

鶯蟄爲二月之節

御覽十八

昏東井中曉箕中斗建卯位之初

律中夾鍾

二月氣至則夾鍾之律應夾鍾者夷則之所生三分

益一管長七寸四分

全上

驚蟄之日桃始華後五日倉庚鳴後五日鷹化爲鳩
天子居青陽太廟

是月也安萌芽養幼少存諸孤

命有司省囹圄去桎梏無肆掠止獄訟

省減也囹圄所以禁守繫者則今之獄矣木在手曰

桎在足曰梏

全上

是月也命樂正習舞

習舞爲將釋奠

御覽五百三十五

上丁釋奠於國學天子乃率公卿諸侯親往視之

釋謂置也置牲幣之奠於文宣王御覽十八

五百三十五

命有司上戊釋奠於太公廟

亦用牲幣之奠御覽

並全

是月也擇元日命人社

爲祀社稷也春事興故祭之以祈農祥元日謂近春

分前後戊日元吉也御覽三十

五百三十二

歲華紀麗一

事類賦注並全

衛正叔禮記集說引耶氏曰唐李林甫等註月令擇元日命民社元日近春分前後戊日與今註不同以社祭土土畏木甲屬木故不用甲用戊者戊屬土故召詰曰越翼日戊午乃社于新邑郊特牲用甲當是異代之禮案耶氏耶光庭也

二月中氣日在奎

春分爲二月中氣

御覽十八

昏東井中曉南斗中斗建卯位之中

春分之日元鳥至後五日雷乃發聲後五日始電

是月也祀朝日於東郊

春分日祭之

全上

天子獻羔開冰先薦寢廟

謂立春藏冰在春分方溫故獻羔以祭司寒而後開

冰春秋傳曰日在北陸而藏冰西陸朝覲而出之

全上

是月也日夜分則同度量平權衡

分平也因春分晝夜平則正之同亦平也丈尺日度

斗斛曰量稱錘曰權稱上曰衡

御覽八百三十

是月也元鳥至之日以太牢祀於高禴天子親往

燕以施生時來巢堂宇而孚乳產育之象媒氏之官
以爲候變媒言禴者神之也昔高辛氏之代元鳥遺
卵簡狄吞之而生高辛後王因以爲媒官嘉祥而立

其祠焉

御覽十八
事類賦箭注

案此條與鄭注畧同但兩書引經文不重至字又
鄭注本作高辛氏之世今注作代避唐諱也以此
定爲唐
注無疑

后妃率九嬪御乃禮天子所御帶以弓鞬授以弓矢於
高禴之前

是月也命有司祭馬祖

謂仲春祭馬祖於大澤用剛日

御覽全上
事類賦注

是月也耕者少舍乃修閭扇廩廟畢備

無作大事以妨農事

興兵役之事時將耕慮妨農功

歲華紀麗一

是月也無竭川澤無漉陂池無焚山林

順陽養物也蓄水曰陂穿地通水曰池

御覽全上

是月也祀不用犧牲用圭璧更皮幣

仲春行秋令則其國大水寒氣摠至寇戎來征行冬令則陽氣不勝麥乃不熟人多相掠行夏令則國乃大旱

煖氣早來蟲螟爲害

三月之節日在婁

清明爲三月之節

御覽全上

昏柳中曉南斗中斗建辰位之初

律中姑洗

三月氣至則姑洗之律應姑洗者南呂所生也三分

益一管長七寸一分

全上

清明之日桐始華後五日田鼠化爲鴛後五日虹始見
天子居青陽右个

是月也天子乃薦鞠衣於先帝

鞠衣衣名蓋黃桑之服薦於先帝者爲進於太廟上
命有司覆舟五覆五反乃告舟備具於天子焉天子始
乘舟

薦鮪於寢廟

進時美味

御覽全上
九百三十六

是月也生氣方盛陽氣發泄句者畢出萌者盡達不可
以內

天子布德行惠命有司發倉廩賜貧窮振乏絕開府庫
出幣帛周天下勉諸侯聘名士禮賢者

聘謂問也名士謂有名譽者也

御覽十八

唐月令注
九
三月中氣日在胃

穀雨爲三月中氣

全上

昏張中曉南斗中斗建辰位之中

穀雨之日萍始生後五日鳴鳩拂其羽後五日戴勝降於桑

是月也天子命有司曰時雨將降下水上騰巡行國邑周視原野修利隄防道達溝瀆開通道路無有障塞田獵置罟羅罔畢翳餽獸之藥無出國門

鳥獸字乳不可傷之無逆天時

歲華紀麗一

是月也命有司無伐桑柘

愛蠶食也有司謂王山林之官

御覽十八 八百二十五 通典禮六

紀麗引愛蠶食也

乃修蠶器后妃齊戒享先蠶而躬桑以勸蠶事

蠶器謂薄槌蘧筐之類季春吉祀皇后享先蠶先蠶

天駟也享先蠶而後躬桑示率先天下也

御覽十八 八百二

十五 通典禮六 玉海七十七 文獻通考八十七 路史後紀五 俱引唐月令以先蠶爲天駟

是月也命工師合百工審五庫之量金鐵皮革筋角齒羽箭幹脂膠丹漆無或不良百工咸理監工日號無悖於時無作淫巧以蕩上心

去毛曰革犀兕水牛之屬以爲甲楯鼓鞀

御覽三百五十七

是月也乃合累牛騰馬遊牝於牧犧牲駒犢舉書其數
累繫也騰躍也其牝欲遊則就牧而合御覽八百三十三
是月也擇吉日大合樂天子乃率公卿諸侯大夫親往
視之

大合樂者言行射禮

御覽十八

是月也命國僉九門磔攘以畢春氣

洪範傳曰言之不從則有大禍犬屬金也故磔之於

九門所以抑金扶木畢成春功東方三門不磔春位

不殺且盛德所在無所讓

御覽五百三十一 通典禮卅八紀麗一引有脫誤字

季春行冬令則寒氣時發草木皆肅國有大恐行夏令

則人多疾疫時雨不降山陵不收行秋令則天多沈陰
淫雨早降兵革並起

四月之節日在昴

立夏爲四月之節

御覽二十一
二十三

昏翼中曉牽牛中斗建巳位之初

其日景丁

景丁屬火主夏故云其日景丁

全上二十一

其帝炎帝其神祝融

昔炎帝神農氏以火德繼天而王故爲夏帝火正日

祝融爲火神佐炎帝於夏

全上

其蟲羽

南方朱鳥羽蟲之長凡有羽之類皆屬於火故曰其

蟲羽

全上

其音徵

三分宮去一以生徵徵數五十四屬火以其徵一作微清

事之象也夏氣和則徵聲調樂記曰徵亂則哀其事

勤

全上

通典樂三注引同無樂記云云

律中仲呂

四月氣至則仲呂之律應仲呂者無射之所生三分

益一管長六寸六分

全上

其數七其性禮其事視其味苦其臭焦

其祀竈祭先肺

立夏之日螻蝈鳴後五日蚯蚓出後五日王瓜生

天子居明堂左个乘朱輅駕赤駟載赤旂衣朱衣服赤玉食菽與彘其器高以粗

太史以先立夏三日謁於天子曰某日立夏盛德在火天子乃齊

立夏之日天子親率公卿大夫以迎夏於南郊還乃行賞公卿諸侯大夫於朝慶賜遂行無不欣說

迎夏爲祀赤帝赤燁怒於南郊以炎帝配以祝融燹

惑三辰七宿從祀

白帖

命相贊傑俊遂賢良舉長大

贊猶揚也遂猶達也傑俊謂才兼於人者

御覽二十一

行爵出祿必當其位

無虛授也

全上

是月也命樂正習盛樂大雩帝

雩者祭天祈雨之名爲將大雩先習盛樂自鞞鞞至

祝致皆作故曰盛樂

全上 御覽十一引雩者祭天祈雨之名大雩爲用盛樂也

命有司禱祀山川古之卿士有益於人者以祈穀實

是月也命有司祀雨師

立夏之後申日祀雨師於國城西南

白帖
通典禮四

四月中氣日在畢

小滿爲四月中氣

御覽二十一

昏軫中曉須女中斗建巳位之中

小滿之日苦菜秀後五日靡草死後五日小暑至

挺重囚出輕繫

挺猶寬也重囚寬之至秋方決輕繫出而捨之

全上

是月也繼長增高無有壞墮

無起土功無發大衆無伐大樹

爲妨蠶農之事

全上
八百二十二

是月也天子初衣暑服

論語曰當暑紵絺綌謂暑服 御覽全上二十一

命有司巡行田原爲天子勞農勉人無或失時

勸農人以及時 御覽八百二十二

是月也驅獸無害五穀

獸麋鹿之屬食穀苗驅之令勿害也 御覽八百二十七

無大田獵

恐傷生類 御覽二十一

農乃登麥天子乃以彘嘗麥羞以含桃先薦寢廟

含桃櫻桃也先薦寢廟後乃食之 全上

是月也蠶事既登后妃獻繭乃收繭稅以桑爲均貴賤長幼如一以給郊廟之服

后妃獻繭進其成功也乃收繭稅十而取一以桑爲均者謂用桑多則繭多桑少則繭少貴賤長幼如一各自以桑爲均不得以人貴賤長幼爲差

御覽二十一引首一

句餘見八百二十五

是月也天子飲耐用禮樂

酎之言醇也春酒至此始成與羣臣飲之

御覽全上二十一

孟夏行秋令則苦雨數來五穀不滋四鄙入保行冬令則草木早枯後乃大水敗其城郭行春令則蝗蟲爲災

暴風來格秀草不實

五月之節日在參

芒種爲五月之節

御覽全上

昏角中曉危中斗建午位之初

律中蕤賓

五月氣至則蕤賓之律應蕤賓者應鍾之所生三分

益一管長六寸三分

全上

芒種之日螳螂生後五日鴉始鳴後五日反舌無聲

天子居明堂太廟

令人無艾藍以染無燒灰

是月也門閭無閉關市無索

順陽氣 歲華紀麗二

游牝別羣則繫騰駒

恐相蹄齧 御覽全上二十一

班馬政

馬政謂掌十二閑養馬之政教 全上

是月也聚蓄百藥

因草木蕃廡之時則採聚百藥 全上

五月中氣日在東井

夏至爲五月中氣 全上

昏亢中曉營室中斗建午位之中

夏至之日鹿角解後五日蝸始鳴後五日半夏生

是月也祀皇地祇於方丘

夏至之日祀皇地祇於方丘以高祖神堯皇帝配坐

以岳瀆等神從祀

全上
五百二十四

是月也日長至陰陽爭死生分

夏至之日漏刻長陽氣欲衰陰氣欲興陽日生陰日

死至之日相與分

御覽全上二十一

君子齊戒處必掩身無躁

以陰陽相爭之時務欲安靜

全上

止聲色無或進薄滋味無致和

謂陰陽始與身尙靜味尙薄

全上

案陽當作氣

節嗜慾定心氣

微陰扶精不可散

全上

百官靜事無刑以定晏陰之所成

是月也命有司祭先牧

謂仲夏祭先牧於大澤用剛日

御覽五百二十四
八百三十三

是月也無用火於南方

陽氣盛又用火於其方害微陰

御覽全上二十一

可以居高明可以遠眺望可以升山陵可以處臺榭

是月暑氣方盛可以登高望遠順陽居上

全上

仲夏行冬令則雹凍傷穀道路不通暴兵來至行春令則五穀晚熟百騰時起其國乃虛行秋令則草木零落果實早成人殃於疫

騰徒登反又音特

騰神龜

音訓俱出五經文字

六月之節日在東井

小暑爲六月之節

御覽全上

昏氏中曉東壁中斗建未位之初

律中林鍾

六月氣至則林鍾之律應林鍾者黃鍾之所生三分

去一管長六寸 全上

小暑之日溫風至後五日蟋蟀居壁後五日鷹乃學習
天子居明堂右个

是月也命有司染絲黼黻文章必以法故無或差貸黑
黃蒼赤莫不質良無敢詐僞以給郊廟祭祀之服以爲
旗章以別貴賤等級之度

六月中氣日在柳

大暑爲六月中氣 全上

昏尾中曉奎中斗建未位之中

大暑之日腐草爲螢後五日土潤溽暑後五日大雨時

行

乃燒薙行水利以殺草可以糞田疇可以美土疆

薙謂迫地芟草也此謂欲耕萊田先薙其草草乾燒之此月大雨流水潦蓄其中則草死不復生而地美可耕稼也

御覽八百二十一

是月也樹木方盛乃命有司入山行木無有斬伐

爲其未堅成也

御覽二十一

不可以興土功不可以合諸侯不可以起兵動衆

季夏行春令則穀實鮮落國多風欬人乃遷徙行秋令則邱隰水潦禾稼不熟乃多女災行冬令則風寒不時

鷹隼早鷙四鄙入保

中央土

火休而盛德在土

全上

其日戊巳

戊巳屬土故曰其日戊巳

全上

其帝黃帝其神后土

昔黃帝軒轅氏以土德繼天而王故爲黃帝土官之

神曰后土

全上

其蟲倮

無毛羽鱗介之類

全上

其音宮

聲始於宮宮數八十一屬土以其最大樂記曰宮亂

則荒其音驕

全上 案最大字下當有君之象也四字疑脫通典樂四注引同無樂記云云

律中黃鍾之宮

黃鍾主十一月土在林鍾夷則之間各有分主不可

假借故引黃鍾之清宮以爲土律其管半黃鍾之管

長四寸五分則黃鍾之清宮也故季夏十八日已後

土王氣至則黃鍾之宮應之也

全上

其數五其性信其事思其味甘其臭香

其祀中霤祭先心

中霤猶中室也祭中霤之禮爲俎先進心也

全上
御覽五

百二
十四

是月也祀黃帝於南郊

謂季夏土德王日則祀黃帝含樞紐於南郊以軒轅

配坐以后土鎮星從祀

御覽五百二十四

天子居太廟太室乘黃輅駕黃龍載黃旂衣黃衣服黃
玉食稷與牛其器圖以閔

七月之節日在張

立秋爲七月之節

御覽二十四

昏尾中曉婁中斗建申位之初

其日庚辛

庚辛屬金金主秋故云其日庚辛

全上

其帝少皞其神蓐收

昔少皞氏以金德繼天而王故爲秋帝金正曰蓐收
故蓐收爲金神佐少皞於秋

全上

其蟲毛

西方白虎毛蟲之長凡有毛之類皆屬於金故曰其

蟲毛

全上 案唐諱虎注白虎當依經文武始交改作武

其音商

三分徵益一以生商商數七十二屬金以其濁次宮

臣之象也秋氣和則商聲調樂記曰商亂則陂其宮

壤

全上
通典樂三

律中夷則

七月氣至則夷則之律應夷則者大呂之所生三分

去一管長五寸六分

全上

其數九

金生數四成數九但言九者舉其成數

全上

其性義其事言

洪範五行傳曰西方金其性義其事言言曰從從作

又王者言從又和則神龜至

全上
事類賦注

其味辛其臭腥

凡臭味辛腥者皆屬於金

御覽全上

其祀門祭先肝

秋陰氣出祀之於門外陰也秋爲陰中於藏值肝凡

祀門爲俎先進肝

立秋之日涼風至後五日白露降後五日寒蟬鳴

天子居總章左个乘白輅駕白駱載白旂衣白衣服白
玉食酒與魚其器廉以深

總章左个當申上之室乘白輅衣白衣從秋色也食
酒與魚秋味之宜也其器廉以深象金傷害物入藏

上全

太史以先立秋三日謁於天子曰某日立秋盛德在金
天子乃齊

立秋之日天子親率公卿諸侯大夫以迎秋於西郊還
乃賞軍帥武人於朝

迎秋爲祀白帝白招拒於西郊以少皞配坐以蓐收
太白三辰七宿從祀 全上

乃命將帥選士勵兵簡練傑雋專任有功以征不義誅
誅暴慢以明好惡順彼遠方

詰謂問其罪順猶服也 全上

七月中氣日在張

處暑爲七月中氣 全上

昏箕中曉昴中斗建申位之中

處暑之日鷹乃祭鳥後五日天地始肅後五日禾乃登
是月也命有司修法制繕囿園具桎梏斲薄刑決小罪
是月也築塲園農乃登穀天子嘗新先薦寢廟
是月也命有司納材葦

蒲葦之屬此時柔脆可取作器物 御覽一千

修宮室坏牆垣補城郭

爲經夏雨損立秋後修補 御覽全上二十四

孟秋行冬令則陰氣大勝介蟲敗穀戎兵乃來行春令則其國乃旱陽氣復還五穀無實行夏令則其國火災寒熱不節人多瘡疾

八月之節日在翼

白露爲八月之節

全上

昏南斗中曉畢中斗建酉位之初

律中南呂

八月氣至則南呂之律應南呂者太族之所生三分

去一管長五寸三分

全上

白露之日鴻鷹來後五日元鳥歸後五日羣鳥養羞

天子居總章太廟

是月也養衰老授几杖行糜粥飲食

行猶賜也

全上

是月也命有司循行犧牲視全具案芻豢瞻肥瘠察物色必比類量小大視長短皆中度五者備當上帝其饗是月也天子乃儺以達秋氣

此儺儺陽氣恐傷暑至此不衰害亦將及人故儺以

通秋氣方欲助秋故不磔犬

御覽全上 五百三十
通典禮卅八傷作陽

是月也命樂正習吹上丁釋奠於國學天子乃率諸侯大夫親往視之

春夏尙舞秋冬尙吹習之爲將釋奠

御覽全上二十一
四百三十三

五
事類賦注

是月也命有司上戊釋奠於太公廟

是月也擇元日命人社

賽秋成也元日謂近秋分前後戊日

御覽五百三十二
歲華紀麗

三引下
七字

八月中氣日在軫

秋分爲八月中氣

御覽二十四

昏南斗中曉東井中斗建酉位之中

秋分之日雷乃收聲後五日蟄蟲坯戶後五日水始涸

是月也祀夕月於西郊

秋分日記之 全上

是月也命有司享壽星於南郊

秋分日祭壽星於南郊壽星南極老人星 全上

通典禮四

日夜分則同度量平權衡

因秋分晝夜平則正之 御覽全上

是月也命有司祭馬社

謂中秋祭馬社於大澤用剛日 全上

天子嘗麻先薦寢廟

命有司申嚴百刑斬殺必當無畱有罪無或枉撓枉撓

不當反受其殃

是月也勸人種麥無或失時

仲秋行春令則秋雨不降草木生榮國乃有恐行夏令則其國乃旱蟄蟲不藏五穀復生行冬令則風災數起收雷先行草木早死

九月之節日在角

寒露爲九月之節

全上

昏牽牛中曉東井中斗建戌位之初

律中無射

九月氣至則無射之律應無射夾鍾之所生三分去

一管長四寸九分 全上

寒露之日鴻鴈來賓後五日雀入大水爲蛤後五日菊有黃華

天子居總章右个

命有司申嚴號令命百官貴賤無不務內以會天地之藏無有宣出

是月也命有司伐蛟取鼃登龜取鼈

四者甲類秋乃堅成故是月登取 全上

九月中氣日在氐

霜降爲九月中氣 全上

昏須女中曉椰中斗建戌位之中

霜降之日豺乃祭獸後五日草木黃落後五日蟄蟲咸
俯

是月也霜始降則百工休

謂膠漆之作停

全上

乃命有司曰寒氣摠至人力不堪其皆入室

霜降後清風戒寒所以令入室

御覽三十四

是月也命有司具飭衣裳文繡有恆衣服有量冠帶有
常必循其故

是月也天子嘗稻先薦寢廟

月令
稻初熟 御覽二十四

乃命有司農事備收舉五穀之要藏帝藉於神倉祇敬
必飭

是月也命有司合秩芻以養犧牲以供皇天上帝名山
大川四方之神以祠宗廟社稷之靈爲人祈福

秩芻謂草稅也

歲華紀麗三

命樂正習吹大饗帝於明堂

謂祀昊天於明堂五方帝五官從祀

白帖

命有司嘗犧牲告備於天子

是月也趣人收斂務蓄菜

始爲御冬之備

歲華紀麗三

案此依鄭注也鄭注作始爲御冬之備汲古閣校本歲華紀麗引經作人从唐月令也引注始爲下缺一字依唐本當定作人他本徑填作民者非是

乃伐薪爲炭

伐必因殺氣

御覽全上

季秋行夏令則其國大水冬藏殃敗人多軌噓行冬令則國多盜賊邊境不寧土地分裂行春令則燠風來至人氣解情師興不居

十月之節日在房

立冬爲十月之節

御覽二十六

昏虛中曉張中斗建亥位之初

其日壬癸

壬癸屬水主冬

全上

其帝顓頊其神元冥

昔顓頊氏以水德繼天而王故爲冬帝水正曰元冥

故元冥爲水神佐顓頊於冬

全上

其蟲介

北方元武介蟲之長凡有甲之類皆屬於水故曰其

蟲介介甲也

全上

其音羽

三分商去一以生羽羽數四十八屬水以爲最清物
之象也冬氣和則羽聲調樂記曰羽亂則危其財匱

全上

通典樂三注引同無樂記云云

律中應鍾

十月氣至則應鍾之律應應鍾者姑洗之所生三分
去一管長四寸七分

全上

其數六其性智其事聽

其味鹹其臭朽

凡臭味鹹朽者皆屬於水

全上

其祀井祭先腎



立冬之日水始冰後五日地始凍後五日野雞入大水
爲蜃

天子居元堂左个乘元輅駕鐵驪載元旂衣元衣服元
玉食黍與鴈其器閤以掩

食黍與鴈冬味之宜

全上

太史以先立冬三日謁於天子曰某日立冬盛德在水
天子乃齊

立冬之日天子親率公卿諸侯大夫以迎冬於北郊

迎冬爲祀黑帝汁光紀於北郊以顓頊配坐以元冥
恆星三辰七宿從祀

全上

還乃賞死事恤孤寡

察阿黨則罪無有掩蔽

是月也可以築城郭造宮室穿竇窖修囷倉

謂改築城郭創造宮室修囷倉以備積貯

全上

是月也天子始裘

謂初衣寒衣

全上

是月也祭神州地祇於北郊

謂立冬日祭神州地祇於北郊太宗文武皇帝配坐

御覽五百

二十四

是月也命有司祭司寒

謂孟冬祭司寒於北郊

全上

是月也命有司祭司中司命司人司祿

謂立冬後亥日祭於國城西北

全上
通典禮四

十月中氣日在尾

小雪爲十月中氣

御覽二十六

昏危中曉翼中斗建亥位之中

小雪之日虹藏不見後五日天氣上騰地氣下降後五日閉塞而成冬

命有司謹蓋藏循行積聚無有不歛

蓋藏謂府庫困倉之類

歲華紀麗四

坏城郭戒門閭修鍵閉備邊境謹關梁塞蹊徑

蹊徑謂山澤禽獸道

御覽二十六

飭喪紀辨衣裳審棺槨之薄厚塋邱壟之小大高卑厚薄之度貴賤之等級

是月也命工師效功陳祭器案度程無作淫巧以蕩上心功致爲上物勒工名以考其誠功有不當必行其罪是月也大飲烝勞農以休息之

十月農事既畢黨正屬民飲酒正齒位是也詩曰十

月滌場朋酒斯饗指此

歲華紀麗四

案此依鄭注也紀麗用唐注民當作人今

作民者後人所改

是月也易關市來征旅納貨賄以便人事四方來集遠鄉皆至則財不匱上無乏用百事乃遂

是月也命有司收水澤之賦無令侵削兆人以爲天子取怨於下其有若此者行罪無赦

川賦魚鹽蜃蛤之類澤賦萑蒲之類

白帖紀麗四

是月也乃命有司秣稻必齊麩蘖必時淇熾必潔水泉必香淘器必良火齊必得兼用六物酒官監之無有差貸

有司謂煮酒之官六物者一曰秣稻二曰麩蘖三曰淇熾四曰水泉五曰淘器六曰火齊命酒官監之無

有差貸差貸謂失誤善惡

御覽八百四十三

孟冬行春令則凍閉不密地氣上泄人多流亡行夏令則國多暴風方冬不寒蟄蟲復出

巽爲風立夏巽用事故行夏令則多暴風夏氣干時

方冬而溫蟲以寒蟄溫而復出

御覽三十四

行秋令則雪霜不時小兵時起土地侵削

十一月之節日在箕

大雪爲十一月之節

御覽二十六

昏營室中曉軫中斗建子位之初

律中黃鍾

十一月氣至則黃鍾之律應黃鍾者律之始也管長

九寸全上

大雪之日鵲鳥不鳴後五日武始交後五日荔挺出

天子居元堂太廟

命有司土事無作無發室屋及起大衆以固而閉地氣
且泄是謂發天地之房諸蟄則死人必疾疫又隨以喪
是月也命內宰申宮令審門閤謹房室必重閉雖有貴
戚近習無有不禁

命有司祈祀四海大川名源井泉

十一月中氣日在北斗

冬至爲十一月中氣

御覽全上

昏東壁中曉角中斗建子位之中

冬至之日蚯蚓結後五日麋角解後五日水泉動

是月也祀昊天上帝於圓丘

謂冬至日祀昊天上帝於圓丘以高祖神堯皇帝配坐以五方帝及日月星辰及內外星官等從祀於壇

御覽全上

設古閣校本歲華紀麗四引此注字句有脫誤

是月也農有不收藏積聚者馬牛禽獸有放逸者取之不詰

禾在野牛馬傷之人有取者不罪所以戒其主也

歲華

山林藪澤有能取蔬食田獵禽獸者有司教道之其有相侵奪者罪之不赦

是月也命有司祭馬步

謂仲冬祭馬步於大澤用剛日 御覽二十六

是月也伐木取竹箭

此時堅成可伐取之

全上三百四十九
歲華紀麗四

是月也日短至陰陽爭諸生蕩

君子齊戒處必掩身身無躁去聲色禁嗜慾安形性事欲靜以待陰陽之所定

是月也可以罷官之無事去器之無用者

仲冬行夏令則其國乃旱氛霧冥冥雷乃發聲行秋令則天時雨汁瓜瓠不成國有大兵行春令則蟲蝗爲敗水泉咸竭人多疥癩

十二月之節日在北斗

小寒爲十二月之節

御覽全上二十六

昏奎中曉亢中斗建丑位之初

律中大呂

十二月氣至則大呂之律應大呂者蕤賓之所生三

分益一管長八寸四分

全上

小寒之日鷹北鄉後五日鵲始巢後五日野雉始雊

天子居元堂右个

命將帥講武習射御角力乃教田獵以習五戎班馬政
命僕夫七駟咸駕載旌旒授車以級整設於屏外有司
摺扑北面以誓之天子乃厲飾執弓挾矢以獵

講武角力校武士材力所以備畋獵之禮厲飾謂衣
戎服尙威武以獵 全上

命有司修祭禽之禮

修祭禽之禮謂以所獵得禽獸以供禘祭 全上

天子乃禘百神於南郊爲來年祈福於天宗 五經文字云經典作

蜡唯新月令作蜡音乍
通典禮四云今取祭義故从示

蜡臘日祭之名也百神神農后稷句芒田峻岳鎮海
瀆耶陵墳隰鱗介羽毛之類天宗日月星辰之屬是

也

白帖

歲華紀麗四引無百神注

十二月中氣日在虛女

大寒爲十二月中氣

昏婁中曉氏中斗建丑位之中

大寒之日雞始乳後五日鷺鳥厲疾後五日水澤腹堅
是月也命有司始漁天子親往乃嘗魚先薦寢廟

時魚潔美

御覽二十六

冰方盛命取而藏之

冰已入令告人出五種命農計耦耕修耒耜具田器

冰既入令有司告人出五穀之種明大寒氣過農事

將興修田器

御覽八百二十三
農事將興

二十六引寒氣過

命有司出土牛以示農耕之早晚

謂於國城之南立土牛若立春在十二月望則策牛

人近前示其農早也立春在十二月晦及正月朔則

策牛人當中示其農平也立春近正月望則策牛人

近後示其農晚也

御覽二十六引無
首一語从白帖增

是月也日窮於次月窮於紀星回於天數將幾終歲且

更始專其農人無有所使

言運行屨而於故處次舍也紀猶會也

御覽三

天子乃與公卿大夫共飭國典論時令以待來歲之宜
周官建寅之月懸法於象魏以示人四時之令皆以
此爲準故以建丑之月與公卿先飭之

御覽二十六

是月也合諸侯制百縣爲來歲受朔日與諸侯所稅於
人輕重之法貢職之數以遠近土宜爲度以給郊廟之
事無有所私

乃命有司次諸侯之列賦之犧牲以共享祀

乃命同姓之邦共寢廟之芻豢

凡在天下九州之人無不咸獻其力以其皇天上帝社稷寢廟山林川澤之祀

人非神福不生

歲華紀麗四

命樂正大合吹而罷

乃命有司收秩薪柴以供郊廟及百祀之薪燎

命有司大饗旁磔以送寒氣

大饗爲歲終逐除陰疫以送寒氣故周官命方相氏率百隸索室驅疫以逐之旁謂王城四旁十二門也磔謂磔犬於門也春磔九門冬禮大故徧磔於十二門所以扶陽抑陰之義犬屬金冬盡春與春爲木故

殺金以助木氣

御覽二十六
通典禮二十八

五百三十

季冬行秋令則白露早降介蟲爲妖四鄙入保行春令則胎夭多傷國多固疾命之曰逆行夏令則水潦敗國時雪不降水凍消釋

唐月令注補遺

其音角

謂樂器之聲三分羽益一以生角角數六十四屬木

以其清濁中人象也春氣和則角聲調

通典樂三

案此依鄭注也通典引月令云正月其音角引注
作人象不作民下更接云其二月三月不見者並
在正月他物倣
此係唐本無疑

上丁釋奠於國學天子乃率公卿諸侯大大親往視之

觀其禮也

御覽五百三十五

勸人種麥無或失時

勸農人以及時

全上八百二十二

命取而藏之

春秋傳曰日在北陸而藏水

全上二十六